



Monografia da l'artist Constant Känz

Constant Känz vegn undrà cun il Premi da cultura 2014. Uss cumpara ina monografia da l'artist.

2



Sindoria da Dominique Dosch

Dacurt ha la giuvna scriptura surminara Dominique Dosch preschentà ses cudesch a Schlarigna.

13

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuira, tel. 081 920 07 10, mail: redaktion-lq@suedostschweiz.ch

Il bab ha il dretg d'avair quità da l'uffant

■ (anr/vi) Dapi l'entschatta fanadur vai pli tgunsch per ils babs d'obtegnair il dretg d'avair quità dals uffants. Responsabla per conceder quest dretg als babs betg maridads è l'Autorità per la protecziun d'uffants e da creuschids (Apuc). Giusep Defuns, il manader da l'Apuc a Glion, explitescha tge che ha midà.

Avant aveva – tar geniturs betg maridads – sulet la mamma il dretg d'avair quità da l'uffant. Dapi l'entschatta fanadur pon ils geniturs betg maridads far ina declaranza ch'els giavi-

schian il quità communabel. Sche la mamma n'è betg d'accord po il bab sa drizzar a l'Apuc. Lezza conceda ad el il dretg – nun che quai giess encunter il bainstar da l'uffant. «La latta è dentant fitg auta», di Giusep Defuns. I dovria motivs massivs per betg conceder al bab il quità communabel ensemen cun la mamma.

La revisiun ha introduci il princip che omadus geniturs – spartids u betg maridads – duain avoir quità per l'uffant.


> PAGINA 2

In regal gagliard

Presentaziun dils plans da Remo Stoffel e Pius Truffer

DA GIUSEP VENZIN / ANR

■ «Ei battan ils da Val.» Il president communal Stefan Schmid suppona e spera ch'ils ulteriurs Svizzers tratgien quei udend dils plans gagliards da Remo Stoffel e Pius Truffer. La dumengia sera han quels presentau da tutta dracca il project dil parc all'entrada dil vitg. Igl architect japanes Tadao Ando ha maun liber en tuts graus. Silla surfatscha da quater hectaras, denter la via cantunala ed il Rein da Val, vul in dils pli renomai architects dil mund «regalar» als vischins da Val in parc. La materia principala ein crap ed aua, las duas resursas che han fatg enconuschent e beinstont il vitg da Gualsers entadem la Lumnezia. Ils iniziants numnan il parc visiunar e speran ch'el daventi magnet turistic. In auter magnet turistic duei il hotel luxurius previu daventar. Il december decida ina giuria tenor ils plans da tgei architect quei hotel vegn construius. Otg architects da muntada separticipeschan alla concurrenza da project. Per ch'il



Val duei daventar enconuschent egl entir mund. Quei duei succeder cun baghetgs da muntada architectonica. Per la realisaziun dil parc (foto) han Remo Stoffel e Pius Truffer engaschau Tadao Ando, in dils pli renomai architects dil mund.

MAD

parc possi vegnir realisau ston ils vischins da Val approbar la mida da zona. Il territori previu duei daventar ina zona da parc. Schigleiti che la lubientscha da

baghegiar seigi avon maun mondi ei liber, ha Remo Stoffel detg. Peter Schmid cumbatta vinavon ils plans digl investur indigen. Senza la vendita da habitadi se-

cundar seigien ils plans strusch realisabels, suppona il vischin da Val.

> PAGINA 3

Sensibilisar unfants pigl priewel da fi

■ (anr/gns) Gio per la 4. geda segna la sieranza da bietsg cantunala per l'acziun da scolaras «fi ed ava» a Tusang. La fegnameira principala da chella acziun è da far attent juvenils agl priewel digl fi e dall'ava, scu tgi è da reager an cass urgents e cunzont er tge consequenzas tgi so dar antras en

incendi u ava gronda. All'acziun tgi cozza anc anfignen all'antschatta d'orgover sa partecipeschan 2200 scolaras da tot las regiuns digl cantun. Ier ischans er nous stos a Tusang e vurdo agls giuvens pumpiers sur igls givis.

> PAGINA 11



Egn digls instructours fò attent agl priewel tgi dat tar avas grondas.

FOTO G. N. STGIER

Nizagear las resursas naturalas an Val Schons

■ (anr/br) Quest atun vean messa ad ir an Val Schons la zona da comerzi regionala. Par dar sustegn ad ella vean ussa lantscho egn project ca vut nizagear anc miglier an la regiun las resursas naturalas. Que project da model e egn da 33 ca vean sustanieu finanzialmeing da la confederaziun, parquegl c'el promova egn svilup direvel digl teri-

tori. Igl success dapenda digl angaschamaint a da la partizipaziun digls mastregnants a da l'economia regionala. Egn'amprema sera d'infurmaziun à musso c'igl e avant mèn tant intaress sco ear vuschs scepticas. Egn'amprema runda da rimnar ideias concretas e lantschada.

> PAGINA 12

Viager culla fantasia i'l Chesin Manella

■ (anr/vp) «Sindoria», il prim roman da fantasia in rumauntsch, es gnieu preschanto in sanda zievamezdi i'l Chesin Manella a Schlarigna. La giuvna autura surmirana Dominique Dosch ho preschanto al public engiadinais sieu prim cudesch. Il stil da scriver da la giuvna da 19 ans ho inchanto a tuot ils preschaints. «Eau nu sun riveda da schmetter da ler quist cudesch», ho dit üna da las preschaintas i'l Chesin Manella in occasiun da la prelecziun dal roman. Il muond realistic ch'is masda cun ün nouv muond da fantasia plain misteris e tensiun ho impreschiuno. Zieva duos ans e mez da lavur s'allegra Dosch da pudair preschanter sieu roman.

> PAGINA 13

Hans Maissen ella direcziun dalla Syna

■ (anr/hh) Il Sursilvan Hans Maissen ei dapi l'entschatta da quest meins commember dalla direcziun dalla Syna, il secund grond sindicat en Svizra. Avon che surprender la funcziun nova ella sedia principala ad Olten eis el staus in onn e miez responsabel per la regiun dil Grischn.

> PAGINA 5

Propi nigina sorpresa

Daniel Albertin candidescha scu mastral

■ (anr/gns) Anfignen oz era betg anc ancunschaint schi Daniel Albertin, igl deputo ed actual mastral da Mon, candidescha scu president communal digl nov cumegn Albula/Alvra. Siva pi lung taimp da ponderaziun ed an cunvegna cun la famiglia è Daniel Albertin, tgi ò 43 onns, sa decida da sa metter a dispoisziun per la tscherna da chel uffezi. Igl suveran digl cumegn Albula/Alvra, agl qual appartignan igls cumegn Alvra-

schagn, Alvagni, Brinzauls, Casti, Mon, Surava e Stierva, eligia igls 28 da settember igl ampren president communal dallas set vischnancas fusiunadas an Val Alvra. La candidatura da Daniel Albertin è propi nigina sorpresa er cun avoir mano el scu parsoura la gruppa da project da fusiun e chegl an moda fitg cumpetenta. Daniel Albertin deplorescha bagn tgi anfignen oz seia el igl unic candidat per chel post da mastral digl cumegn Albula/

Alvra. El manegia er tgi pi tgunsch resta el igl sulet candidat cun betg avoir igls seis mastrals digls oters cumegn interest per chel uffezi. La candidatura scu mastral digl cumegn Albula/Alvra seia er stada en muteiv tgi el vegia demissiuno scu commember dalla cumischung da gestiun digl cantun. Igl post da mastral digl cumegn fusiuno an Sotse è en uffezi parzial da 30% anfignen 50%, chegl tenor igl regulativ.



Daniel Albertin candidescha uffizialmaintg scu mastral digl cumegn Albula/Alvra.

FOTO G. N. STGIER